

आकाशवाणी

खबरां:-

1. बिहार विधानसभा चुनाव दे पैहले गेड दा प्रचार अज्ज सजा सम्पनन् होई गेआ। बक्ख बक्ख राजनीतिक दलें दे नेता मतदाताएं गी अपने पक्ख च करोआने लेई पूर जोर कोशिश करा र दे ना।
2. निर्वाचन आयोग नै अज्ज विशेष गहन पुनरीक्षण-एस.आई.आर. अभियान दे दूए चरण दी शुरूआत कीती।
3. विदेश मंत्री डा. एस जय शंकर होरें आक्खेआ जे भारत गजा शान्ति योजना दा समर्थन करदा ऐ ते कन्नै एह बी मेद एह जे एहदे नै उत्थे स्थाई रमानदारी लेई बत्त पदरी होग।
4. भारत नै लकाह यानि रेबीज दे फैलने गी रोकने च टापू आहले मुख्य तिमोर लेस्ते गी अलकाह प्रतिरोधक छमता आहली दोआई दियां 2 ज्हार शीशियां ते रेबीज टीके दियां 10 ज्हार खराकां भेजियां ना।
5. मौसम विभाग नै दिल्ली एनसीआर दे इलाके च अज्ज चिरे संजा ते राती लैकिश थाहरें पर हल्की बरखा पौने दे आसार दस्से ना।

<><><><><><>

Bihar Politics

बिहार विधानसभा चुनाव दे पैहले गेड दा प्रचार अज्ज सजा सम्पनन् होई गेआ। बक्ख बक्ख राजनीतिक दलें दे नेता मतदाताएं गी अपने पक्ख च करोआने लेई पूर जोर कोशिश करा र दे ना। इस गेड च 6 नवम्बर गी 18 जिलें दे 121 विधान-सभा क्षेत्रें च वोट पाए जाने ना। भारतीय जनता पार्टी जनता दल यूनाइटेड, राष्ट्रीय जनता दल ते कांग्रेस सनें केई प्रमुख नेताएं अज्ज रैलियां कीतियां। दरभंगा च इक रैली गी संबोधित करदे होई भाजपा दे वरिष्ठ नेता ते गृह मंत्री अमित शाह होरें वायदा कीता जे एनडीए राज्य दे हर जिले च कौशल विकास केंद्र बनाग। उने घोषणा कीती जे हर जिले च इक नमा कारखाना लगोग ते राज्य च 10 नमें औद्योगिक पार्क बनाए जाडन। श्री शाह होरें आक्खेआ जे एनडीए सरकार उत्तर प्रदेश ते तमिलनाडु आहला लेखा बिहार च भी इक रक्षा गलियारा स्थापित करोग। भाजपा दे वरिष्ठ नेता ते उत्तर प्रदेश दे मुख् मंत्री योगी आदित्यनाथ होरें भी दरभंगा थवा भाजपा उम्मीदवार संजय हुंदे आस्तै प्रचार कीता।

दूई पेठा, आर जे डी नेता मीसा भारती होरें आक्खेआ जे महागठबंधन गी जबरदस्त समर्थन थहोआ र दा ऐ। उने आक्खेआ जे गठबंधन युवाएं, महिलाएं, महंगाई ते नौकरियों दी गल्ल करा र दा । इक होरें आर जे डी नेता ते सांसद मनोज झा होरें आक्खेआ जे चुनाव प्रचार ठीक चला र दा ऐ। जन सोआराज दे संस्थापक प्रशांत किशोर होरें बी अपनी पार्टी दे मेदवारें दे समर्थन च रोड शो कीता।

<><><><><><>

EC SIR

निर्वाचन आयोग नै अज्ज विशेष गहन पुनरीक्षण-एस.आई.आर. अभियान दे दूए चरण दी शुरूआत कीती। इस अभियान तैहत नौ राज्यें ते त्रै केंद्र शासित प्रदेशें दे 51 करोड मतदाताएं दा पुनरीक्षण कीता जाग। मतदाता सूचियों दा व्यापक पुनरीक्षण 7 फरवरी, 2026 गी अंतिम मतदाता सूची दे प्रकाशन कन्नै सम्पन्न होग। नमें चरण च अंडमान ते निकोबार द्वीप समूह, लक्षद्वीप, छत्तीसगढ़, गोवा, गुजरात, केरल, मध्य प्रदेश, पुद्दुचेरी, राजस्थान, तमिलनाडु, उत्तर प्रदेश ते पश्चिम-बंगाल शामिल होंडन। इनदे च

तमिलनाडु, पुद्दुचेरी, केरल ते पश्चिम बंगाल च 2026 च विधानसभा चुनाव होंडना गणना दा चरण 4 दिसंबर तक चलोग। 9 दिसंबर गी मसौदा मतदाता सूची प्रकाशित कीत जाग। अगले बरे आठ जनवरी तक दावे ते आपत्तियां दर्ज कीतियां जाडना। 9 दिसंबर सोयां 31 जनवरी, 2026 तक सुनवाई ते सत्यापन होग। इने 12 राज्यें ते केंद्र शासित प्रदेशें च मतदाता सूचियां पैहले सोयां गै निष्क्रिय करी दिती गई ऐ। बूथ स्तर दे अधिकारी वर्तमान पंजीकृत मतदाताएं गी विशिष्ट गणना प्रपत्र वितरित करोंग। इने फॉर्म च उनदे मौजूदा मतदाता विवरण शामिल ना। अगर उनदा नां 2003 दी मतदाता सूची च बी हा तां उनें गी कोई बादू दस्तावेज जमा कराने दी लोड नेई ऐ। निर्वाचन आयोग मूजब, एस.आई.आर दा मकसद एह यकीनी करना ऐ जे अवैध प्रवासियें सनें अपात्र नाएं गी हटान्दे होई कोई भी पात्र नागरिक सूची सोयां रेई नेई जा। इस प्रक्रिया च मतदाताएं दे जन्म स्थान दा सत्यापन शामिल ऐ। अधिकारियें दा आक्खेआ ऐ जे इसदे कन्ने ओह लोक जेडे साहडे नागरिक नेई हेन खास तौर पर बांग्लादेश ते म्यांमा दे अवैध प्रवासियें दी पहचान कराने च मदद मिलोग।

<><><><><><>

EAM Gaza

विदेशमंत्री डाक्टर एस. जयशंकर होरें अज्ज आखेया ऐ कि भारत गाज़ा शांति योजना दा समर्थन करदा ऐ ते कन्नै एह मेद बी जे एहदे नै उत्थे स्थाई रमानदारी लेई बत्त पदरी होग। अज्ज नमीं दिल्ली च इजराइल दे विदेश मंत्री गिदोन सार हुंदे कन्नै लग्गी दी बैठका च उने आखेया जे भारत ते इजराइल दवै आतंकवाद दियें चुनौतियें दा सामना करै करदे न ते दौनें मुल्लें दा आतंकवाद दे हर रुपै ते गतिविधियें गी दना बर्दाश्त नेई करने दा नजरिया कुल संसारी सतह पर जकीनी बनाने दी दिशा च कम्म करना जरुरी ऐ। इजराइली विदेशमंत्री ते शिष्टमंडल दा सुआगत करदे होई डाक्टर जयशंकर होरें आखेया जे भारत ते इजराइल सामरिक भयाल न ते केई बारी कठन ते अजमैश दी घड़ी च बी दवै किट्टे खडोते दे रेह ना।

<><><><><><>

India-Timor Leste

भारत नै अलकाह यानि रेबीज दे फैलने गी रोकने च टापू आहले मुख्ब तिमोर लेस्ते गी अलकाह प्रतिरोधक छमता आहली दोआई इम्यूनोग्लोबुलिन दियां 2 ज्हार शीशियां ते रेबीज टीके दियां 10 ज्हार खुराकां भेजियां ना। भारत नै ग्लोबल साउथ दे देशें लेई इक भरोसेमंद ते निर्भर रेही सकने आहले सेहत भयाल दे रुपै च अपनी भूमिका निभांदे होई एह खेप भेजी ऐ। विश्व सेहत संगठन मुजब तिमोर लेस्ते च मार्च 2024 च माहनू च अलकाह दा पैहला-पैहला मामला सामने आया हा। ओहदे बाद डब्ल्यू.एच.ओ. नै मुल्लें दे सेहत मंत्रालय गी रेवीज टीके दियां 6 ज्हार खुराकां ते इम्यूनोग्लोबिन दियां 2 ज्हार खुराकां भेजियां हियां। एहदे इलावा बी 31 अगस्त गी डब्ल्यू.एच.ओ. आसेया खरीदी गेदी वैक्सीन दी 10 ज्हार बादू खुराकां ते आर.आई.जी. दी इक ज्हार खुराकां डिली गी दिती गई ही।

<><><><><><>

LG- Jhiri Mela

उपराज्यपाल मनोज सिन्हा होरें अज्ज उत्तर-प्रदेश दे सब्भनें शा बड्डे मेले झिडी मेले दा उदघाटन कीता। एह इक प्रतिष्ठित सांस्कृतिक ते आध्यात्मिक मेला ऐ जेडा करसान संत बाबा जित्तो हुंदे सम्मान च हर बरे आयोजित किता जंदा ऐ। इस मौके पर उपराज्यपाल मनोज सिन्हा होरें इक तीर्थ यात्री सामुदायिक भवन ते 4 Modular Bus Stop गी बी लोकें दे निमित्त लाया ते मड सब-डिविजन च सी.एस.आर. तैहत पैहले इंडोर स्पोर्ट्स काम्प्लैक्स दा नीं पत्थर रखेया। इस मौके पर उपराज्यपाल होरें लोकें गी निस्वार्थ सेवा दी बत्ता गी अपनाने ते बाबा जित्तो दे सुखने दे न्यायपूर्ण ते समतापूर्ण समाज दे निर्माण लेई कम्म करने दा संकल्प लैने दा आह्वान कीता।

<><><><><><>

Weather

जम्मू-कश्मीर च अज्जै दपैहरी दे बाद किश टांवी-टांवी थाहरें पर हलकी कणी-कणोन होआ रदी ऐ। मौसम विभाग मुजब उच्चिएं धारें पर संझा चिरै ते राती लै हल्की बरखा ते बर्फबारी होने दा इमकान ऐ। संझा'लै किश थाहरें पर बिजली चमकना ते अंधी झक्खड़ झुल्ली सकदा ऐ ते दिनें ते राती दे तापमान च गिरावट औने दी मेद ऐ। मुतल्लका प्रशासन आस्सेआ करसानें गी पैहले गै सलाह दित्ती गई ऐ जे ओहू 4 ते 5 नवंबर गी अपनी गतिविधिऐं गी रोकिए रक्खन तां जे कुसै चाल्ली दा नुकसान उनेंगी नेई होऐ। लोकें गी बी सलाह दित्ती गई ऐ जे ओहू इस अवधि दरान सौहगे ते सतर्क रौहना। कल दपैहरी तगर मौसम बदलोखड़ा, किश थाहरें हलकी बर्फबारी ते बरख दे आसार दस्से गेदे ना।

<><><><><><>

President – Guru Nank Dev Jayanti

राष्ट्रपति द्रौपदी मुर्मु होरें गुरु नानक जयंती दी पैहली संजा सारे देशवासियें गी शुभकामनाएं दितियां ना। अपने सनेहू च राष्ट्रपति होरें आक्खेआ जे एह मौका सारे गी गुरु नानक देव हुन्दे आदर्शें ते मूल्यें गी अपनाने आस्तै प्रेरित करदा ऐ ते इक बेहतर समाज दे निर्माण दी दिशा च मार्गदर्शन करदा ऐ। उने आक्खेआ जे गुरु नानक जी हुन्दा सनेहा सखान्दा ऐ जे सच्च, न्याय ते करुणा पर आधारित जीवन जीना गै सफलता दा सच्चा मापदंड ऐ। राष्ट्रपति होरें सारे थवा गुरु नानक देव हुन्दे आदर्शें गी अपने जीवन च अपनाने ते इक मता शांतिपूर्ण ते समृद्ध राष्ट्र दे निर्माण आस्तै उनदे दस्से गेदे रस्ते पर चलने दा आग्रह कीता।

<><><><><><>

VP

उपराष्ट्रपति सी.पी. राधाकृष्णन होरें आक्खेआ ऐ जे देश 2047 तक विकसित भारत बनने आहली भेठा अगो बदा र दा ऐ जित्थे गरीबें सनें हर इक नागरिक गी सर्वोत्तम सेहत सुविधा उपलब्ध होंडन। केरल दे तिरुवनंतपुरम च श्री चित्रा तिरुनल आयुर्विज्ञान ते प्रौद्योगिकी संस्थान च कार्यक्रम गी सम्बोधित करदे होई उपराष्ट्रपति होरें आक्खेआ जे इसदा लाहभ दूर-दराज दे क्षेत्रें च रौहने आहले लोकें तगर पुज्जना लोडचदा।

<><><><><><>

PM- Life

प्रधानमंत्री नरेन्द्र मोदी होरें अज्ज केन्द्रीय मंत्री भूपेन्द्र यादव हुंदा इक लेख सांझा कीता-जिस च दस्सेया गया जे कियां “भारत लाईफ” (पर्यावरण लेई जीवन शैली) तमिनाडू दी एरी Tank प्रणालियें शा लेइयै राजस्थान दे जोहाड़ तोड़ी सर्दियें थमां चली आ'रदी संरक्षण प्रथाएं गी पुर्नजीवित करा रदा ऐ ते उनेंगी धरतै दी सेवा दे इक सचेत कम्में दे रूपे च पेश करा'रदा ऐ। इक सोशल मीडिया पोस्ट च प्रधानमंत्री होरें भारत दे इक संदेश पर बी लौ पाई जे सच्ची स्थिरता गल्लबात शा नेई बल्कि पोषण थमां शुरु हुंदी ऐ।

<><><><><><>

Chhatisgarh Rail

छत्तीसगढ़ दे बिलासपुर शहर दे लाल-खदान कश अज्ज संजा इक यात्री रेलगाड़ी ते मालगाड़ी बश्कार टक्कर होई गेई। हुनै तगर घटना आहली थाहर थवा चार लौथे गी बरामद कीता गेआ ऐ इस हादसे च 20 लोकें दे घायल होने दी शैंका ऐ। रेलवे, जिला प्रशासन ते पुलिस दे वरिष्ठ अधिकारी घटना आहली थाहर पर पुज्जी गए ना। राहत ते बचाव कम्म युद्धस्तर पर जारी ऐ। तोआंई जम्मू कश्मीर दे राजौरी जिले च अज्ज जम्मू-राजौरी-पुंछ जरनैली सिडकै पर इक मिनी बस दे परतोई जाने कारण घट्टो-घट्ट 28 लोक जखमी होई गे- जिंदे च ज्यादातर विद्यार्थी दस्से जा करदे ना। अधिकारिक जानकारी मुजब एह हादसा उस्सलै पेश आया- जिसलै राजौरी जा रदी एह मिनी बस ठंडी कस्सी कश, ड्राइवर दा कंट्रोल नेई रौहने कारण सिडकै पर परतोई गेई। हादसा होंदे गै लोक मदद लेई

उत्थे पुज्जे गे, 26 विद्यार्थियें सनें सव्भतें घायलें गी राजौरी दे सरकारी मैडिकल कालेज अस्पताल पुजाया गया जित्थे उन्दा इलाज चलै करदा ऐ।

<><><><><><>

Sexual Assault Case

तमिलनाडु राज्य पुलिस नै कोयम्बटूर च कॉलेज छात्रा कन्नै यौन उत्पीडन दे मामले च 3 लोकें गी गिरफ्तार कीता । एह घटना 2 नवम्बर गी कोयम्बटूर अंतरराष्ट्रीय हवाई अड्डे दे नेडे होई ही। कोयम्बटूर संदिग्धें गी गिरफ्तार कीता। पुलिस दी शुरूआती जानकारी मूजब एह सारे निर्माण कम्म च लग्गे दे मजदूर ना। ओह कोयंबटूर अंतरराष्ट्रीय हवाई अड्डे कश खाली पेदी जमीन सोयां लगभग 4 किमी दूर निर्माण कम्म करा र दे हे। इने लोकें 25 बरे दी महिला दे मित्र पर हमला करने मगरा यौन उत्पीडन कीता हा।

<><><><><><>

Steel Capacity

केंद्रीय इस्पात मंत्री एच. डी. कुमारस्वामी होरें अज्ज नमी दिल्ली च विशेष इस्पात आस्तै उत्पादन कन्ने जुडी दी प्रोत्साहन योजना – पी.एल.आई. वन. पॉइंट टू दे त्रिए दौर दी शुभारुआत कीती। इस मौके उने आक्खेआ जे 6 हजार 3 सौ करोड़ रुपे सोयां मते दे खर्च आहली इस योजना दा लक्ष्य अगले किश बरे च लगभग 26 मिलियन टन विशेष इस्पात क्षमता बदाना ऐ।

कुमारस्वामी होरें पिछली उपलब्धियें बारे च दस्सेआ पीएलआई योजना नै हुनै तगर 43 हजार 874 करोड़ रुपे सोयां मते दा निवेश आकर्षित कीता ऐ। उने आक्खेआ जे इस दौरान रोजगार दे 30हजार सोयां मते प्रत्यक्ष मौके पैदा होए ना।

<><><><><><>

IMD

मौसम विभाग नै दिल्ली एन.सी.आर. दे इलाके च अज्ज' चिरे संजा ते राती'लै किश टांवी-टांवी थाहरें पर हलकी बरखा बरने दे आसार दस्से न ते उत्थे कल दपैहरी तगर मौसम बदलोखडा बने दा रौहगा। तोंआई दिल्ली एन.सी.आर. च ब्हा दा म्यार अजें बी बडे माडे दर्जे दा बने दा ऐ। अज्ज दपैहरी लै एअरक्वालिटी इंडैक्स औसतन 305 दे कोलकाल रेहा ते अज्ज रातीं बरखा दी पेशगोई कन्नै कल बडुलै तगर होई सकदा ऐ जे एहदे च दना सुधार होऐ। मौसम विभाग नै अंडमान निकोबार टापुएं पर अज्ज अंधी-झक्खड झुल्लने ते गर्जी-चमकियै बरने दे बी असार दस्से देना। इसै चाली दा मौसम अज्ज चिरे संजा कोला कल दपैहरी मगरा तगर आंध्र-प्रदेश- हिमाचल प्रदेश- जम्मू-कश्मीर- लद्दाख- तमिनाडू- पुडुचेरी- तेलंगाना ते उत्तराखंड च बी बने रौहने दी तबक्को ऐ।

<><><><><><>

Weather

जम्मू-कश्मीर च अज्जै दपैहरी दे बाद किश टांवी-टांवी थाहरें पर हलकी कणी-कणोन होआ रदी ऐ। मौसम विभाग मुजब उच्चिणं धारें पर संजा चिरै ते राती लै हलकी बरखा ते बर्फबारी होने दा इमकान ऐ। संजा'लै किश थाहरें पर बिजली चमकना ते अंधी झक्खड झुल्ली सकदा ऐ ते दिनें ते राती दे तापमान च गिरावट औने दी मेद ऐ। मुतल्लका प्रशासन आस्सेआ करसानें गी पैहले गै सलाह दिती गेई ऐ जे ओह 4 ते 5 नवंबर गी अपनी गतिविधिं गी रोकिए रक्खन तां जे कुसै चाल्ली दा नुकसान उनेंगी नेई होऐ। लोकें गी बी सलाह दिती गेई ऐ जे ओह इस अवधि दरान सौहगे ते सतर्क रौहन। कल दपैहरी तगर मौसम बदलोखडा, किश थाहरें हलकी बर्फबारी ते बरख दे आसार दस्से गेदे ना।

<><><><><><>

India Roamania

उद्योग ते बपार राज्यमंत्री जितिन प्रसाद होरें अज्ज रोमानिया दियें विदेशमंत्री ओआना सिलविया टोइउ हुंदे कन्नै बुचारेस्ट च दपक्खी बैठक लाइयै केई महत्वपूर्ण विषयें पर गल्लबात कीती। मंत्रालय आसेया जारी जानकारी मुजब गल्लबात दौरान आपू च बपार-कारोबार बधाने, रासपूंजी लाने ते बंड सप्लाई दी बवस्था च सुधार आहन्ने सने केई होर विषय पर विचार बटांदरा किता गया। मंत्रालय नै दस्सेया जे गल्लबात दौरान दौने धडें इस गल्ले

पर अपनी सैहमती जताई इक साफ-सुथरे, स्थिर ते सांझे हितें आहले भारत यूरोपी मुक्त बपार समझो लेई पूरी संजीदगी कन्नै किट्टे रलियै जतन करगंन।



LG -Jhiri Mela (Byte)

उपराज्यपाल मनोज सिन्हा होरें अज्ज उत्तर-प्रदेश दे सब्भनें शा बड्डे “झिड़ी” मेले दा उदघाटन कीता। एह इक प्रतिष्ठित सांस्कृतिक ते आध्यात्मिक मेला ऐ जेड़ा करसान संत बाबा जित्तो हुंदे सम्मान च हर बरे आयोजित किता जंदा ऐ। इस मौके पर उपराज्यपाल मनोज सिन्हा होरें इक तीर्थ यात्री सामुदायिक भवन ते 4 Modular Bus Stop गी बी लोकें दे निमित्त लाया ते मढ सब-डिविजन च सी.एस.आर. तैहत पैहले इंडोर स्पोर्टस काम्पलैक्स दा नींह पत्थर रखेया। इस मौके पर उपराज्यपाल होरें लोकें गी निस्वार्थ सेवा दी बत्ता गी अपनाने ते बाबा जित्तो दे सुखने दे न्यायपूर्ण ते समतापूर्ण समाज दे निर्माण लेई कम्म करने दा संकल्प लैने दा आह्वान कीता।

हफते तकर चलने आहला एह उत्सव देश-विदेश थमां शरदालुएं ते सैलानियें गी आकर्षित करोग। अधिकारियें सुरक्षा-यातायात प्रबंधन-चिकित्सा सहायता ते स्वच्छता सने सब्भै बवस्था पूरी लैतियां ना।



Jammu-Home stays

जम्मू सैलसफा विभाग नै इक्क नमीं पहलकदमी दी शुरूआत कीती ऐ जेदे तैहत घरै दे मालिक अपनी संपत्ति गी होमस्टे च बदली सकदे न जेदे आस्तै उनेंगी पंजीकरण करोआना होग। ओहू इनें होम-स्टे च परौहनें दी खातिरदारी करी सकदे ना। इस प्रोग्राम दा मकसद मकामी सैलसफा गी बढावा देना ऐ कीजे एहदे तैहत यात्री जम्मू दे कुदरती शलैपे, मकामी खान-पान ते रीति-रिवाजें दा नन्द लेई सकदे ना। होम-स्टे च रूची रखने आहले लोक अपने कागज पत्तर जियां के जमीन दी मालकी दे कागज, सर्टिफिकेट, आधार कार्ड समेत होर जरूरी कागज पंजीकरण आस्तै जमा करोआई सकदे ना। पंजीकरण ते तफसीली जानकारी आस्ते ओहू डायरेक्टोरेट ऑफ टूरिज्म जम्मू दे दफ्तर जाई सकदे न जा फही 1800-890-8457 उप्पर फोन करी सकदे ना।



NSE

नैशनल स्टॉक एक्सचेंज (एन.एस.ई) नै मूल्य निर्धारण गी बेहतर बनाने लेई वायदा ते विकल्प च प्री-ओपन सत्र शुरू करने दी घोषणा कीती ऐ। एन.एस.ई इस बरे 8 दिसम्बर थमां Equity वायदा ते विकल्प लेई 15 Mint. दा प्री-ओपन सत्र शुरू करोग, तांजे मूल्य निर्धारण गी बेहतर बनाया जाई सकै। Gap –Movement दे सरबंध्यै च पारदर्शिता च सुधार किता जाई सकै ते अस्थिरता गी नियंत्रित किता जाई सकै। एह प्री-ओपन सत्र बड्डुलै 9 बजे थमां 9 बजियै 15 मिनट तोड़ी दी कॉल निलामी –Window होग, जिस कन्नै नियमित Trading सत्र शा पैहले Index ते सिंगल स्टॉक वायदे लेई शुरूआती मूल्य निर्धारित किता जाई सकोग।

